

禹貢圖註





禹貢圖註

輯南艾

中華民國二十五年十二月初版

禹貢圖集書成初編

輯者艾南英

發行人  
王雲五

印刷所  
商務印書館

發行所  
商務印書館

上海及各埠

禹貢圖註序

禹貢一書古今地理志之祖學者窮經將以經世則仰觀俯察莫非分內事胡可皓首一經聽其汶汶已也是編內註一遵蔡氏定于功令不可易也而又刪繁就簡者以便童蒙者記誦耳其所刪有不可廢者仍錄爲外註并諸儒之論精核足與傳註互相發明者亦咸收之以備參攷間有訂訛釋疑皆出前儒之言無敢私心妄用若乃疆域之下形勝表裏之獨詳古今都會之孰優以至河道之遷徙轉運之難易猶加意焉者非贅也形

勝要害守國之所重而河淮汶濟之閒又今國家蒿目之秋吾黨所不可不講也古人左圖右書故蕭何入秦取圖籍而漢業旋定馬援聚米爲山谷而虜在目中今人徒讀書而廢圖譬如欲聞人之言不欲見人之形而謂知其人也可乎是圖攷正特詳與經傳一字不迕凡脈絡之紓曲方面之縱橫讀者開卷瞭然矣語云不出戶知天下或者亦有在于斯與古臨艾南英千子題于

富西齋

禹貢圖註

明 古臨艾南英千子輯

夏書

禹貢作於虞時而繫之夏書者禹之王以是功也

禹貢

上之所取謂之賦下之所供謂之貢獨以貢名篇者貢夏后氏田賦之總名也


王氏曰挈貢名篇有大一統之義存焉

禹敷土隨山刊木奠高山大川


九州分域圖 每方七百里


禹貢圖註





# 九州貢道圖 每方百里






敷分也分別土地以爲九州也奠定也定高山大川以別州境也方洪水橫流不辨區域禹分九州之境隨山之勢相其便宜斬木通道以治之又定其山之高者與其川之大者以爲之紀綱此三者禹治水之要故作書者首述之


斬木通道或謂去水之障蔽竊恐木旣障水則水之觸木處必且衝激怒號雖有斧斤將安施乎當是伐木開道以便相視耳

冀州古爲燕趙幽代今則太行以西卽山西等處  
太行以東卽北京薊遼等處古北居庸以外一帶  
皆爲□□

冀州圖 每方三百里

一〇





冀州

冀州帝都之地三面距河不言疆界者以餘州所至可見亦以尊京師示王者無外之意

熊氏曰冀州北距長城山爲塞卽北狄之境獮狁匈奴突厥契丹皆居其地有天下定都建邑長安洛陽之外此亦一會也○我明定鼎幽燕正冀之東北隅右擁太行左環遼海北枕居庸阻三面以制天下之全可謂形勢之勝然而居庸古北口紫荆等處迫近□□烽火易驚故雖得居重馭輕之勢不無扼吭拊

背之虞其爲陰雨之防蓋亦亟矣

既載壺口

旣者已然之詞載始事也壺口山名河流南下之衝治之所以殺河勢也

治梁及岐

梁呂梁山也岐狐岐山也二山河水所經治之所以開河道也

酈道元謂呂梁之石崇竦河勢激蕩震動天地此禹旣事壺口乃卽治梁及岐也先儒以爲雍州梁州者

非是朱子曰壺口梁岐及太原皆先續後地本用功之始而言也豈治之有獨難與

既修太原至于岳陽

修因鯀之功而修之也廣平曰原岳太岳也山南曰陽太原汾水之所出太岳汾水之所經東入于河此則導汾水也

陳氏曰惟冀州有修治之辭餘州皆無之非餘州皆無事也以冀例之見餘州之役自禹創始者皆曰治修鯀之功者皆曰修蒙冀文也